

東
華
續
錄

東華續錄

乾隆三十九

臣王先謙敬編

臣周瀚蕃恭校

乾隆十四年己巳春正月庚戌朔諭元旦天氣清朗旭日融和羣情欣豫定卜今歲如願經略大學士傅恆已抵軍營除夕申刻接奏摺惟時朕已封筆此 皇祖 皇考成憲經歲惟此片刻之間所奏揀員辦理糧運卽自行酌定朕於夜分封筆後亦未嘗稍閒也○辛亥諭軍機大臣等據經略大學士傅恆奏稱卡撒一路尤爲險要請親身督軍若與岳鍾琪共駐黨壩恐未免轉滋顧忌非其所願不若將此一路添調重兵專委岳鍾琪辦理等語經略大學士所見未免慮之太過朕前所降諭旨早爲籌及業經詳悉指示經略大學士接到自能領會朕再三裁酌地有平險勢有難易

與其致力卡撒邀不可必之功徒挫士氣究難進取不若經由黨壩一路避奇險之堅礪乘可用之兵力尚可連獲勝陣殲醜執誠以爲納降奏凱之地至岳鍾琪不免顧慮私情經略大學士至彼開誠布公自能感動但既有此情形不若明降諭旨令其釋然於中協力共濟於事更爲有益經略大學士宜體悉此意所有諭旨一道著交經略大學士閱看於應發時卽行頒發俾岳鍾琪傅爾丹一體遵照○諭大學士傅恆奉命經略軍營一切機宜悉聽調度朕觀番境情形大兵自當徑由黨壩一路攻取著傳諭經略大學士傅恆統領提督岳鍾琪督率官兵剋期進剿迅奏膚功其卡撒一路亦屬緊要應酌分滿漢官兵數千交內大臣傅爾丹相機辦理收犄角之效岳鍾琪等身膺軍旅重寄各宜稟承節制協力和衷共建殊勳以副委任○諭朕閱經略大學士傅恆屢次奏報

番境道路奇險軍行艱瘁朕知經略大學士乃自請督師之人所奏實不過十得其五然卽此而觀則人力之難施大槩可見從前訥親張廣泗若將此等情形據實入奏朕必早有裁酌何至勞費若此此固朕上年運度駁雜所致而蒙蔽之罪伊二人實已不容於誅矣且如天赦班攔等處羊腸鳥道備極險巇經略大學士惟躬親跋履乃深悉其難而訥親則肩輿牽挽鞭撻騶卒以爲笑樂宜其視若尋常耳但經略大學士密奏撲碉終非長策應另爲籌辦朕思賊番據險負嵎凡屬要害俱有堅碉撲碉而外更有何計訥親張廣泗之罪實在欺蔽偷安種種乖張至於驅兵撲碉似未可以爲非朕前亦曾密諭欲令索倫兵善登山者潛繞賊碉之後攻其無備或竟攻其巢穴中堅使賊棄碉內顧惟此一策或尙可用然亦險著未知果能奏效否况據稱大金川地方處處俱有碉

樓可見番境築碣自古爲然此乃天造地設以爲羣酋窟穴卽得其地亦不能盡行毀撤經略大學士昨在小金川暫駐籌辦未知所籌辦者若何又有抵營通盤籌辦妥協然後進取之奏經略大學士意中欲作何籌辦附便詳悉奏聞至稱小金川番人迎接時其恭順不及瓦寺沃日朕思瓦寺沃日與內地切近向化是其本心小金川較遠原係化外蓋亦天然界限所以古稱蠻夷荒服以不洽治之經略大學士留兵在彼彈壓想確有所見不專爲米糧火藥也此事屢經貽誤從前馬良柱連有克捷若益以三千人早可奏功而張廣泗不與此一誤也張廣泗分兵十路措置乖方不能乘機前進此二誤也訥親身圖安逸不能鼓勵士眾又不將實情入告此三誤也用兵何事經此三誤賊酋轉多三番抵禦又不知增置堅碣若干更難措手經略大學士昨奏比初辦更實事之

語甚是朕在數千里外固不能燭燭其難是以又有此番料理經略大學士朱履其地亦無由深知其難是以力請視師今朕已洞悉形勢決意收局經略大學士目擊身親所見甯不相同朕前調遣滿兵本欲一舉制勝邇來揆理度勢前所諭四月初旬之期更不可再有游移計大兵全數抵營尙不出二月有暮春而月之功自可奏王師三捷之效經略大學士奏稱俟至四月容臣奏到然後頒發班師諭旨朕已於前諭詳示至三月杪四月初如十分得其七八自當毋惜一簣之勞若僅得其半卽宜於威武振揚之時納降順撫善圖竣事迨各營整隊分撤以次徐行辦理亦須經月已在仲夏暑雨之時矣至前諭分設武弁駐守勒烏圍刮耳崖若三月內果得勒烏圍刮耳崖尙須斟酌若不能則但以萬人令岳鍾琪坐鎮爐地防禦自足綏輯蠻徼朕熟計深思無逾於此再經

略大學士所奏岳鍾琪具稟一摺深中肯綮勞三所帶第二起官兵遲滯不前雖已行文督催究不知何日抵營各起滿兵於何時全到彼中形勢窄偏難容多人滿兵若已敷用卽可及時進討其遠地如雲南甘肅之兵應計其能於二月內到齊與否若能到催其速到未到者俱應照湖廣之例速檄停止縱中途道回較之緩不及事徒勞往返者尙可少節糜費著傳諭經略大學士傳恆及尙書舒赫德知之○壬子諭軍機大臣等今日新正令辰恭迎皇太后聖母鑾輿內廷春譙仰蒙 慈諭經略大學士傳恆忠誠任事爲國家實力宣猷皇帝宜加恩錫封彼以公爵以旌勤勞欽承 恩訓深愜朕心但封公之旨應俟奏捷到日頒發著先行傳諭俾知 聖母厚恩在經略大學士素志謙沖必將具摺懇辭此斷可不必經略大學士此番出力實爲國家生色朝廷錫命褒庸

止論其人之能稱與否豈必犁庭執馘方足稱功卽如大學士鄂爾泰張廷玉亦因其勤慎翊贊封爵酬庸何當有汗馬勞耶若經略大學士因有此恩旨感激思奮不顧艱險必期圖所難成抑或避居功之名必欲盡埽蠻氛生擒渠首方馳露布而凡有克捷槩不具報皆非朕所望於經略大學士者經略大學士卽不具奏舒赫德亦應一一據實奏報總之馳報軍情宜於頻速必朝夕相聞瞭如目覩方足慰朕懸切朕前諭四月初旬爲期乃再三審度更無游移用兵原非易事何可逞人意以違天意耶經略大學士試思在京辦事之時識見才力視朕何如今朕意已定自當遵旨而行况經略大學士卽能成功亦皆衆人之功朕降此旨所以擴充經略大學士之識量使盡化一己功名之見耳一切機宜連日所降諭旨俱已備悉惟望經略大學士仰體 慈懷欽承渥澤諸凡

從長妥辦俾國家軍民均有裨益朕實幸焉○諭今日閱班第所奏川省夫馬錢糧拮据之狀及舒赫德所奏直隸山陝一帶地方情形朕心深爲追悔不知上年何以辦理至此豈非前諭所謂命運使然者耶然總因從前在事諸臣並無一人據實入告朕實不知其難卽經略大學士傅恆在朕前時亦不知其難近經朕悉心訪問經略大學士又身履番境班第等亦稍稍敷陳朕始悉其險阻困憊舉屬創聞非意料所及若不早爲轉計日引月長勞費無已非惟川省民力難支卽沿途各省半屬邊境騷動可虞而部庫帑項亦將不繼國家亦無爲蠻徼一隅耗竭物力不復顧惜內地之理況此種番蠻乃伊古以來所有上天並育並生原置之化外聽其涵衍卯息豈能草薶禽獮盡絕種類亦豈能法繩禮縛悉就羈縻若必以中國之治治之是以人力而抗天心也夫理之所在

臣不能違君子不能違父人願可違天乎天不可違則成功豈能
豫必朕目前實不敢存盼望成功之意矣經略大學士抵軍相機
籌度滿兵務催令到齊遵朕前諭直趨黨壩以副三月杪四月初
旬之期若能攻克勒烏圍擒取賊首固所深望而不敢必之事縱
稍遲旬日勢難中棄不然督率士卒摧鋒前進或連得勝陣俾其
震懾乞命因而撫之亦足收局夫以岳鍾琪所將士兵數千鼓舞
驅策尙能奪地殲醜况經略大學士親提軍旅信賞必罰其取勝
自在意中以地利言之黨壩去賊巢較近地勢稍寬而卡撒堅硯
林立且係前此失利之處若因避岳鍾琪分功之嫌而以任難赴
險爲勇設令頓刃懸巖軍威少挫將何以爲班師之地於此事究
復何濟是以朕熟思審處計無逾此經略大學士躬在行間深籌
勝算卽有奇謀異策亦當無逾於此在經略大學士忠勇奮發立

志滅賊非犁庭執馘無以快意但自朕思之亦何必爲其已甚此番自出都以及抵軍夙夜勤勞心堅金石籌辦庶務明敏周詳已足爲國家宣力爲朝廷增色詎待縈莎羅奔郎卡之首獻俘闕下方可稱功耶至班第卓爾奏稱努三所帶第一起滿兵於正月月中旬可到軍營官兵行走原定五百一起五日全行今可趨爲四日以五千七百人計之按站計程須得五十日是各起滿兵到齊卽毫無阻滯亦必在二月半以後其綠旗兵又須在滿兵之後非五六月不能到齊若必俟到齊則遷延時日轉盼逾期虛費貲糧誠屬無益今旣已定期四月初旬則此等綠旗未到之兵如三月半不能到者卽應檄停是以昨諭舒赫德令將雲南甘肅之兵計算日期酌量停止但事難遙度如軍前仍有需用經略大學士卽知會舒赫德班第令其遵照調遣不必拘泥究之事有難爲功有難

就兵亦人耳以之撲礮徒致傷生豈遽得志而賊之要害俱築堅
礮舍此又未必有良策之可施則緣旗官兵之用否正宜斟酌毋
謂調遣已至中途前功可惜遂遷就之也○命山東巡撫備造

周公廟及四氏先賢廟祭器○癸丑諭大學士伯張廷玉 三朝

舊臣襄贊宣猷敬慎夙著朕屢加曲體降旨令其不必向早入朝
而大學士日值內廷寒暑罔間今年幾八袞於承旨時朕見其容
貌少覺清減深爲不忍夫以尊彝重器先代所傳尙當珍惜愛護
况大學士自 皇考時倚任綸扉厯有年所朕御極以來弼亮寅
恭久遠一致乃勤勞宣力之大臣福履所鍾允爲國家祥瑞但恭
奉 遺詔配享 太廟予告歸里誼所不可考之史冊如宋文彥
博十日一至都堂議事節勞優老古有成謨大學士紹休世緒生
長京邸今子孫纓膝良足娛情原不必以林泉爲樂也著於四五

日一至內廷以備顧問城內郊外皆有賜第可隨意安居從容几杖頤養天和長承渥澤副朕眷待耆俊之意且使中外大臣共知國家優崇元老恩禮兼隆而臣子無可已之日自應鞠躬盡瘁以受殊恩俾有所勸勉亦知安心盡職○丙辰諭經略大學士傅恆奏報小金川土舍良爾吉漏洩軍機蔑兄奸嫂罪惡貫盈已於十二月十一日在軍門梟示土婦阿扣於二十二日在美諾正法梟首傳示漢奸王秋拏赴卡撒俟審明處以極刑其二子亦俱卽日伏法等語前據張廣泗力言良爾吉王秋不可輕動恐致滋事且於拏問時向鄂實稱侍衛此行我止謂來辦良爾吉之事此事斷不可辦如欲殺良爾吉阿扣王秋非先殺督臣不能張廣泗之始終庇護良爾吉等如此卽軍前諸人皆明知其罪而疑畏不敢先發今經略大學士傅恆甫至軍營卽不動聲色取兩年通寇如檻

豚圉豕以快人心而儆番眾非謀猷明斷識力堅定曷克臻此卽此已當優敘但經略大學士傅恆於從前議敘之旨見在具摺懇辭若此仍交部議敘無以善全冲挹之美且前因出口步行勤勞過甚所賜雙眼孔雀翎想接到時亦必謙讓未戴今卽以爲經略大學士此番酬庸之典如仍執意謙讓是乃不遵朕旨達爾黨阿舒赫德亦必力勸方是至王秋以王者師王者賓名其二子此卽與邪逆夏如春等無異漢奸心懷不軌造言生事大率類是各省督撫平日必當留心凡涉此等名目卽係叵測之徒卽應嚴行查察究處不可視爲泛常著通行傳諭知之○諭軍機大臣等經略大學士傅恆所奏辦理良爾吉阿扣等一事不動聲色使奸黨卽日伏法殊足爲快此數人皆賊酋心腹今旣翦除彼必膽落而羣賊咸知震懾誠爲蕩寇先聲但伊等究係內地所派領兵助剿之

人就縛尙易然亦幾經籌畫加意戒嚴始得執而戮之未可因此而輕視莎羅奔耶卡聖人云臨事而懼好謀而成軍務一切防範務宜嚴密持重若謂此卽擒滅賊酋之左券朕實未敢自許也經略大學士所奏俟四月底奏到請旨班師此言非是以程站計之奏摺往來定須弔月如四月底具奏則軍營奉到諭旨已是五月之杪經略大學士還朝當在六月以後各路滿漢官兵陸續回營近者在六七月遠者在八九月其閒勞費豈可計算目下滿兵甫經抵營自無遽行遣回之理如四月初果能圍困賊巢成功雖非旦夕可畢而旣已有可指望卽延至四月底五月初尙不爲過不然或得一二陣連勝俾賊酋窮蹙乞命卽可因勢納降尙不失爲識時務之俊傑否則日引月長帑項何能爲繼戶部每年所入及從前動撥軍餉經略大學士素所深悉今部帑動撥旣多外省不

敷協濟已動及留備不得已而開捐爲一切權宜之計籌辦至此
具有苦心而經略大學士所奏臺站添派綠旗兵丁侍衛官弁等
拴喂馬匹芻糧供億實屬浩穢卽使成功迅速而奏凱言還諸路
官兵陸續撤退馬匹陸續回營途次支應不減去時有限之儲蓄
何以供無窮之耗費此四月初旬之諭朕展轉思之計誠無易於
此再亦無可游移况川省連年困於徵發民力實勞憊不支見據
班第奏瀘州道署前有印信硃標告示一張皆大逆不道之言等
語此等奸棍藉端搖惑在他省如夏如春等類亦所常有雖旋卽
伏法不足爲害而地方究宜安靜川省軍興旁午民苦勞役奸民
易於煽動內地深爲可虞經略大學士傳恆躬履其境必已洞悉
情形看來去年此番辦理竟是錯誤朕今實悔之止因辦理至此
勢難中止不得不趁此兵力以僥倖萬一成功然亦所謂飾非文

過之舉耳若去歲秋冬之間但將訥親張廣泗二人治罪以萬人授岳鍾琪駐守打箭爐不作此番調遣內地小民尙可早爲甯息亦不至費今日如許籌慮矣內地民力亟宜顧恤不可不思患豫防又班滾一事屢諭不必辦理蓋係已結之案卽金川事竣亦無庸置問若一經查辦至速亦須旬日所費又將不貲何必增此葛藤况前次傅爾丹奏羅於朝與革松結商通俄木丁誘致班滾在彼時或萬一可望今見良爾吉伏法彼亦具有知覺豈敢復以身試其必不能誘致可知羅於朝之罪尙不至於軍法從事伊係內地將弁仍應遵旨拏解來京交部定議以結塵案朕於此事西顧懸注日夕焦勞此次於亥時接到經略大學士奏摺辦理已過三鼓良以經略大學士勤勞於外朕中宵高枕心實有所不忍耳可傳諭經略大學士並舒赫德知之○丁巳諭向來命將出師必有

參贊此定例也今經略大學士傅恆奉命督師內大臣傅爾丹尙書達爾黨阿舒赫德總督尹繼善策楞俱著參贊軍務經略大學士傅恆調度一切機宜和衷採納務期籌畫萬全於軍旅實有裨益尹繼善策楞未能在任著傳諭巡撫陳宏謀署撫班第於地方一切事宜並臺站供億留心查辦○諭軍機大臣等番境之難乃天生奇險以爲鼠輩窟穴自朕度之此事實應早爲轉計從前聖祖仁皇帝三征沙漠究未親擒噶爾丹是時諸將無不銳意俘馘聖祖仁皇帝因輓運稽遲不得已下詔班師其事載在方略因命鈔出寄看夫以皇祖之神明英武當時文武大臣之智謀勇略滿兵之驍健果銳尙不能得志於平坦之沙漠卷旆而還豈非限於地遠勢有所不能乎今經略大學士自問一己之韜鈴若何同行參贊諸人之籌策若何滿兵之力量若何願欲強其所不

能圖其所難得耶 皇祖之英武超冠千古至於薄海內外無不
仰頌亦由 聖心知進知退洞悉機宜能忘一己之成見俯納羣
言歸於一是實 大聖人萬全無弊之道可以垂法奕禩子孫臣
庶皆當效法以朕所見既知番境之難卽當見險而止經略大學
士接到朕連日所降諭旨定必悉化成見循理度勢熟籌長策慰
朕懸注經略大學士遠勞於外朕固時爲馳念然亦不專於此蓋
國家經費不可不節民力不可不恤而川省之險遠疲困不可不
思患豫防朕所見者遠所全者大著詳悉傳諭經略大學士傳恆
並傅爾丹達爾黨阿舒赫德尹繼善策楞共體此意○裁左春坊
滿漢左諭德二缺○以瑚寶署陝甘總督○朱定元休致以葉一
棟爲左副都御史○吏部議奏班第身任封疆貽誤軍行應革職
得旨班第著革職仍署理四川巡撫效力贖罪○甲子諭金川用

兵一事朕本意欲以禁遏兇暴綏輯羣番並非利其民人土地而從前訥親張廣泗措置乖方屢經貽誤是以特命經略大學士傅恆前往視師熟察形勢相度攻剿經略大學士傅恆奉命以至抵軍忠誠勞勩超出等倫其辦事則鉅細周詳鋤奸則番蠻懾服整頓營伍則紀律嚴明鼓勵戎行則士氣踴躍且終宵督戰不避風雪擊斲奪卡大著聲威誠爲仰副委任朕思最爾窮番何足當我師顏而機政重大部務殷繁諸大臣皆爲此一事馳驅經營經略大學士傅恆乃中朝第一宣力大臣素深倚毗豈可因荒微小醜久稽於外朕心實爲不忍卽擒獲渠魁掃蕩巢穴亦不足以償勞此旨到日經略大學士傅恆著卽馳驛還朝尙書達爾黨阿舒赫德各有部職亦未便久曠總督尹繼善統制全泰邊防綦重著一同回任所有軍營一切事宜交與該省總督策楞提督岳鍾琪等

儘見在兵力足以調派卽傅爾丹尙有滿兵在彼亦應暫留殫心籌畫妥協辦理以竣軍務○諭軍機大臣等朕思用兵一事總係從前不知其難錯誤辦理今已洞悉實在形勢定計撤兵另有諭旨寄發召經略大學士傅恆還朝計此旨到日經略大學士抵營已四十餘日番境所有可進之路自必熟悉而所帶京兵及各路滿兵至者約有三千餘人見在尙乘夜攻碉則滿兵亦必已令其及鋒而用利鈍之勢當已較然果能克捷漸進逼近賊巢成功實有指望此旨不妨暫留稍待時日或此四十日中續到兵多而經略大學士辦理又有就緒功有可成卽掣回此旨亦無不可如堅碉難破尙徘徊卡撒脂嶺之間卽稍進而離賊巢尙遠則遲待亦無可望足見一夫當關萬夫莫敵天險非人力可施用兵之道在知彼知己滿兵雖屬驍勇而所長乃在騎射平原曠野實可以一

常百若以攻碣則石難飲羽長技舉無可展卽據奏石卡守禦僅
十一人我以七百人攻之止斃其半而士兵綠旗死者已十一人
傷者至七十餘人若以百人戰一賊則賊徒三千當用三十萬眾
有是理乎卡撒腊嶺堅碣如此卽予以一月之功未必能克勒烏
圍刮耳崖險必更甚卽有坦道可以直抵勒烏圍刮耳崖而賊巢
仍是堅碣舍攻碣更有何策二千餘斤大礮安能運往施用況懸
軍深入歧徑莫測設伏斷後種種可虞險著詎宜嘗試用兵原非
易事但可希冀成功勞瘁自所不惜不然則以身所目擊萬無可
望之舉欲違其本心勉強從事雖愚者亦不出此君子見幾而作
不俟終日豈宜固執成見結爲癡想今朕所降諭旨名正言順實
經再四籌酌見其確不可移經略大學士遵諭而行於國家已爲
有益於顏面已爲有光况事無鉅細不能全求美善而遠近異勢

中外異情直省辦理不如六部六部不如內廷此理易見何況蠻荒徼外何況軍務機宜又何況屢經貽誤難於措手之會而爲所難爲欲求快意其將能乎經略大學士乃國家第一宣力大臣贊襄機務所關綦重早還一日早辦一日之事卽達爾黨阿舒赫德等亦各有部務豈容久曠從前準噶爾用兵僅委一二大帥金川小醜何值聚如許大臣與之相持經略大學士整理營盤欲變綠旗風氣今旣撤兵則營盤亦無所用而綠旗風氣非旬日可以整頓且亦安能以一人之力徧天下之綠旗而整頓之耶况人情勞苦則怨生經略大學士徹夜督戰固由受恩深重圖報心殷不知其然而然卽朕意亦謂理當如是然他人受恩舉能如經略大學士乎大臣或猶知大義然大臣中卽有受恩最重而已成負恩者何論隨營員弁又何論士卒今無故而驟之鋒鏑之下其有功可

圖者尙踴躍爭先若確知其必不可成而使之捐軀命冒矢石其誰甘之卽岳鍾琪之在黨壩奏報多不據實亦因勢處至難無足深責且此事錯誤朕君臣同之朕旣知而速改所謂以七年之病求三年之艾不早圖則將無及乘此收局猶爲未晚若更日引月長無所底止何以善其後部庫帑藏內地民力皆所當惜經略大學士獨奈何明知錯誤而遷就之且孝賢皇后念經略大學士手足至親教導成就恩意篤摯卽朕亦因孝賢皇后諸弟中能如此忠誠任事殊不易得是以優加眷遇今孝賢皇后服紀已及小祥經略大學士理應奔赴行禮此旨月內可到若二月初旬起程尙可屆期而至經略大學士甯或忘之耶營中諸事可交與傅爾丹策楞令其次第籌辦因勢納降此事原不值經略大學士親身料理交與伊等承辦更爲得體其滿漢官兵當陸續撤回各

整隊伍分起就道酌令岳鍾琪帶兵駐守打箭爐達爾黨阿舒赫德亦一同回任經略大學士在營行師節制皆衆人所親見回京後傅爾丹烏爾登等自可循照辦理如不能妥協各有攸歸朕此旨原爲收局傅爾丹等當知領會如策楞尙未抵軍經略大學士中途相遇亦當以此意密告之此朕國家大計日夕懸注經略大學士不速還不可並非欲經略大學士之前進而以此相激經略大學士如存此見是不以誠心視朕誤更甚矣朕前謂將在外君命有所不受此惟當理而切於事機者方可然孔子又云君命召不俟駕而行其理原互相發明若不論理之當否而謂在外即可不受君命是不明君臣大義而與不俟駕之言相悖矣從前訥親在營惟圖安逸畏縮諸事並不據實陳奏朕降旨令其回京因其本有思家之念自蹈罪愆耳經略大學士行走如此勤勞辦事如

此周到鋤奸如此妥協營伍如此整頓臨陣督戰徹夜露立風雪之中此豈常人所能堪特召還朝實出於朕心之不忍經略大學士甯不能深體朕意耶且番境情形人人共覩必不可再有遷延經略大學士及參贊諸臣共閱此旨以爲於理如何於事勢如何悉心公議如於理勢尙有未合不妨據實陳奏儻無可疑議自應以遵旨爲是蓋臣不可違君子不可違父乃天經地義之當然不遵朕旨爲人臣者敢當此乎經略大學士在京師觀朕辦理諸事凡所豫料是否俱有先見之明若能切中竅要則此事之難易進止自不出朕之範圍經略大學士顧可不熟思而深念之耶朕於今年正月初三日始定撤兵之計今日 皇太后聖母慈諭此卽朕新運順暢之機適與朕前日向軍機大臣所諭符合實願大學士同此嘉祥也著將此旨並傳諭傅爾丹達爾黨阿舒赫德策楞

知之○諭前命侍衛鄂實齋旨交尙書舒赫德將訥親帶往軍前會同經略大學士審明於軍門正法續據富成奏稱訥親不進飲食卧牀不起舒赫德過甯羌時已交法保押赴川省等語訥親負恩誤國宜正典刑今心知情罪重大欲求自斃不得聽其倖免著傳諭鄂實如訥親尙在中途鄂實卽暫留成都催令訥親到日會同該撫藩臬及副都統等宣布此旨於該處將訥親正法鄂實仍赴軍營留住一二日卽行回京若已過成都著速行押赴軍營遵照前旨辦理鄂實亦於一二日回京○丙寅諭經略大學士傅恆自抵軍營卽誅渠魁克磳卡軍威大震賊酋窮蹙求降經略大學士志期殄滅種類欲俟各路兵丁齊到一舉蕩平不肯允降朕思蠢爾窮番何足汙我斧鑕旣已乞降允宜網開三面且經略大學士心膂重臣久勞於外朕心實爲不忍已降旨召令還朝贊襄機

務所有納降事宜命川督策楞隨宜酌辦內大臣傅爾丹暫留統
領滿兵陸續撤回其各路滿漢官兵未抵營者於所至之處著
第紀山高越知會統兵官弁令其按起仍由原路回營不必前進
沿途督撫仍照去時成例一體妥協照料供應毋得玩視著傳諭
直隸山西河南陝甘雲貴各督撫並西安將軍成都副都統知之
至大兵既經撤回軍情亦無庸輓運著一併傳諭班第兆惠高越
等令其酌量悉心妥辦錢糧關繫緊要毋得任聽運糧官役乘機
滋弊○丁卯諭經略大學士傅恆秉心忠亮勇略超羣自奉命以
來晨夕勞勩辦理諸務妥協精詳一抵軍營卽能申明紀律振作
士氣殲除奸慝屢克堅碉賊酋窮蹙乞命經略大學士傅恆志期
一舉蕩平不肯允降朕思蠡爾窮番何足汙我斧鑕宜宏解網之
仁以示如天之量已允王大臣等所議召經略大學士傅恆班師

還朝其納降善後事宜交四川總督策楞辦理朕恭請 皇太后
聖母萬安仰蒙 垂詢朕以班師納降具奏欽奉 慈諭息眾甯
邊乃國家太平長策皇帝御極十有四年予從不問外朝政事上
年皇帝奏聞因係軍國重務時座予懷近見皇帝宵旰焦勞尤爲
注切今既下詔撤兵實我大清國景運興隆億萬年社稷蒼生之
慶大學士傳恆忠勤宣力謀勇兼優成績懋著朝廷封以公爵用
示獎勵予心如是皇帝以爲何如朕念經略大學士傳恆殫心爲
國寶冠等倫超錫五等之崇班允協酬庸之盛典仰遵 慈諭封
爲忠勇公銘勳冊府光我邦家朕實嘉焉○諭朕前降旨將訥親
於軍前正法後經傳諭鄂實帶往成都會同地方官辦理如訥親
已過成都卽催赴軍營照前旨辦理今大兵旣撤不必前往軍營
著於此旨所到之地如係府縣仍卽會同該地方官將訥親正法

儼無官員之處鄂實卽係欽差竟行宣旨正法後告知經略大學士忠勇公傅恆尙書舒赫德可也○庚午諭軍機大臣等金川撤兵一事前兩次召諸王滿漢文武大臣示以朕前後所降諭旨及軍營奏到情形令其各出所見具議以聞據伊等合詞公奏食稱揆理度勢撤兵之旨誠爲允協朕復細加體訪中外人情並無異議且有謂閭巷之人咸爲欣悅者此事朕志先定絕無游移又復詢謀僉同足見理勢當然確不可易惟是昨接經略大學士忠勇公傅恆初九日奏摺內仍有成功不成功回來俱不必論之語與前奏所謂心悅誠服殊相矛盾已經明切指示想能體悉朕意星馳赴闕且大兵停撤無可展布亦無可繫戀矣經略大學士所奏固由報國心殷務期殄滅渠魁以快初志或亦因訥親聞命卽歸經朕譴責以此爲鑒則可不必經略大學士此番行走之勤勞辦

事之勇往陳奏之據實視訥親之偷安高傲蒙蔽欺飾者相去霄壤朕於臣工功罪賞罰出於大中至正經略大學士此番不特朕嘉其實能宣力實足報恩試問之軍營將士皆以爲視訥親何如卽返而自思亦以爲何如殊不必更爲此慮矣且據守備楊自功周郁稱賊寨周圍約三四里石牆七八尺多厚四五丈高內有礮房十餘座等語如此堅礮豈易攻克無論沿江仄徑不能直抵賊巢卽使竟達刮耳崖將坐困石城之下進退無據更不知成何等大不順意之事此中峰直壓之策知經略大學士出於無可如何而意中亦未必自謂萬全妙算儻仍欲僥倖有成豈非大謬經略大學士更不必以未擒莎羅奔即卡未破勒烏圍刮耳崖爲歉蓋金川用兵不出於冒險則出於因循因循則糜餉老師耗竭元氣固失之不及而冒險則奮不顧身民命國儲輕於一擲又失之太

過過猶不及於國事無益有損均耳今經略大學士將彼地情形據實入告朕酌定罷兵之策俾內地民力得以休息部庫帑項得以撙節養和平之福培萬年之基其功視傾巢殲醜輕重爲何如耶至撤兵各事宜尙須詳悉經理經略大學士既遵旨卽日就道不必留辦可一一交策楞傅爾丹等令其酌量次第分布務合機宜如馬良柱帶兵暫駐小金川岳鍾琪駐守打箭爐朕前所指示者不過大槩至一切防範均宜隨時料理期於周密臺站照舊安設軍營事宜照舊開日奏報一次俟有就緒或三四日或五六日一次以漸而減朕心懸注必俟諸大臣俱回至成都後始可釋然再連年用兵以來所費軍需銀兩米石實爲浩繁其中難免浮冒侵漁諸弊經略大學士可諄屬舒赫德策楞徹底清查俾歸實用毋任濫銷又雲貴督撫等會奏派雇長夫背運軍裝一時趕辦不

及一摺雇夫遠涉勢所難行今既撤兵自可毋庸置議然辦理之拮据卽此可見知難而退知過而改乃所謂不遠之復若成見不化必欲爲所難爲如前所陳由中峰直壓賊巢之策必至不可收局是迷復矣經略大學士奈何以盡善盡美之事爲未嫌而轉圖萬無一成之功耶經略大學士又奏陝省官民卽有疲玩之習川民凋敝不由用兵等語此亦經略大學士偏於必欲成功故如此立說其實此番用兵不獨川陝疲敝卽各省亦不免於騷動直隸河南山西大兵經過支應固屬浩繁至兵所不及如江浙米價昂貴亦由川米不到何況川陝頻年供億甯得謂凋敝不緣用兵此豈由衷之言果爾則是昧於事理直是糊塗矣但觀過知仁經略大學士實欲爲國家宣力則此心可以共諒耳今惟遵旨迅速還朝其他槩可勿問儻徘徊不前將擁重兵於外欲何爲耶張允隨

等摺並鈔寄○壬申以拉布敦爲工部右侍郎

由副都統署

○乙亥御

史金相奏一各道御史稽查各省事務宜徹底分濟以專職守一
照刷卷宗戶部三庫月摺與各衙門支領原案既按月交江南道
磨對應將每年送刷上年支領給發原摺原案停止一呈進經史
人數多寡不齊請先翰林次詹事次六科次各道周而復始二三
品以上降革開復宜令吏部每年查明彙題得旨金相此摺著大
學士會同都察院議奏至進呈經史一事朕初意欲博綜古義廣
挹羣言以成執兩用中之治且可因言觀人究悉諸臣學識之高
下心術之眞僞其有關入時政於事理未當者閒加訓飭自舉行
以來諸臣按日奏御朕一一披閱十餘年於茲矣所稱洞達天人
發明道奧者亦殊不槩見茲據金相奏稱分班進書人數多寡不
齊請均勻輪派則是以進書爲煩苦朕前亦聞有此論而不信今

金相既顯有此言是諸臣未必不各有此見且已行之十餘載漸成故套進呈經史之處著停止所有積年留存諸摺著南書房翰林擇其有裨經義政治者薈萃成編用廣中祕之藏朕將親覽焉○丙子諭據經略大學士忠勇公傅恆奏稱番眾震我兵威且糧食將盡屢次喊降正月十二日具稟哀籲經臣開城曉諭十五日又遣伊頭人來營並送還搶去綠旗兵三名觀其情詞懇切窮蹙似係實情因諭以莎羅奔耶卡若親縛赴轅貸以不死臣意乘其投誠仍抵賊窟將二酋帶入內地還朝獻俘等語朕思番酋本屬化外無足深較而馭番之道惟當開示恩信使之弭首帖耳革面革心庶足綏靖蠻氛永無攜貳今莎羅奔耶卡面縛歸誠在經略大學士傅恆受鉞事征志期執敵但既對眾曉諭許以不死若縶之檻車獻俘闕下法當懸首藁街縱賊酋罪無可赦而羣番環視

且畏且驚不若昭布殊仁網開三面著於諭旨所至之處會集文武大小官員宣示綸音解縛釋放並遣弁兵押送回巢布告羣番令知王師有征無戰降者不殺信義宏孚恩威並著包含無外邊徼由此永甯經略大學士傅恆宣力嚴疆成績茂著宜加優敘以示渥恩今據繳還封公諭旨瀝情懇辭國家酬庸晉爵令典攸昭五服五章非朕所得而私亦非經略大學士所得而辭且綸綍所宣風行海寓久頒成命未便收回經略大學士傅恆其勉遵朕旨式克欽承還朝襄贊以副倚毗著將此旨一併曉諭中外原摺併發○丁丑南掌國王島孫奏進牙象

二月己卯朔諭皇后親蠶典禮經朕降旨若遇不行親蠶之年遣妃內一人恭代前因內閣禮部會議冊立皇貴妃禮儀一疏復經降旨冊封典禮於本年三月後舉行其親蠶禮俟正位中宮後該

部照例奏請今據禮部奏稱本年三月內 先蠶祭期請照例遣
妃致祭此於禮意未協夫妃所恭代者代皇后也有皇后則妃可
承命行事皇貴妃未經正位中宮則親蠶之禮尙不當舉行何得
遣妃恭代應照皇帝不親行耕耨順天府尹致祭 先農之例於
內務府總管或禮部太常寺堂官奉宸院卿內酌派一人致祭方
足以明等威而昭儀制該部卽遵諭行將此載入會典○辛巳諭
軍機大臣等本月初三日經略大學士忠勇公傅恆奏到軍前情
形諸摺朕披覽深爲嘉悅賊境堅碉林立若仍蹈前轍徒事攻撲
雖經年不能奏績經略大學士傅恆因有銳師深入從中峰壓下
直搗賊巢之策再三執奏不已經朕嚴切訓諭果能洞達事理翻
然解悟而賊酋因我軍威大振窮蹙急迫屢遣頭人抒誠奉幣哀
籲乞憐經略大學士必令莎羅奔郎卡面縛軍門繫之檻車獻俘

闕下朕以懷遠招攜降者不殺宏開三面活此一隅諭令振旅還朝納降之事交總督策楞隨宜辦理在經略大學士傅恆受鉞專征忠勇奮發志期盪寇振我皇靈是以決策長驅計圖一舉殄滅而朕覆載爲懷涵育異類且據經略大學士傅恆將彼地險阻情形一一據實入告與從前欺蒙貽誤者相去霄壤朕得以備悉其難定計撤兵則此後之保全物命休養太和阜裕國儲甯謐邊徼者皆經略大學士傅恆之功其視殲醜執馘者爲尤大也國家晉爵酬庸封公已爲優典若以經略大學士一片赤誠忠純體國豈尋常之析圭擔爵者可同日語耶所有封公諭旨應卽祇領拜恩不得再行懇辭其前後所降諭旨並奏到諸摺著發交諸王滿漢文武大臣公同閱看俾悉知經略大學士傅恆爲國宣勞奮身殫力具有苦心共相效勉卽朕之開導指示亦悉出於仁至義盡而

始終籌辦此事揆理度勢務合機宜訓飭加恩無非爲國體爲政要初無假借無容心朕賜詩有云上將有心期利執大君無物不包蒙二語實足賅括用兵全局並我君臣之各盡其道心事俱爲披豁矣○諭經略大學士忠勇公傅恆奏稱審訊漢奸王秋張廣泗家人薛二供出張廣泗婪得小金川土司澤旺及已正法之賊黨良爾吉阿扣等金銀一案張廣泗以封疆大員身膺軍旅重寄需索內地屬員尙爲不可乃藉端詐騙番夷金銀多賊貪污藐法玷辱班行貽笑蠻服莫此爲甚伊旣贓私鬯鬯而查出貲產無幾必有巧於隱匿寄頓之處著將伊子張極等拏交刑部並伊家人薛二亦著該督策楞鎖解來京軍機大臣等會同該部嚴審追究定擬並傳諭各省督撫將張廣泗貲財家產一體嚴查毋得徇縱遺漏經略大學士傅恆原摺及所錄供單示梟發交王大臣等閱

看○以王麟爲直隸按察使

山永定河道遷

○乙酉諭軍機大臣等據江

西巡撫唐綏祖奏稱今值軍需旁午請於本任倡捐養廉銀一萬兩並傳同司道府廳州縣著令分別豫捐養廉解赴川省等語金川用兵軍需固屬浩繁但國家當全盛之時公帑所儲足敷撥濟官員養廉乃因事詔祿所以優體臣工用勵操守非可輕議捐扣如果經費不支朕何妨明降諭旨移緩就急今以一隅饋運遂至朕及外僚豈成國體唐綏祖身任封疆以私意小見妄行陳奏甚屬不合著嚴行申飭○丙戌諭朕撫御寬區敕甯中外前因金川小醜致煩王師經略大學士忠勇公傅恆奉命專征威信克著朕命納降順撫振旅還朝從茲邊境乂安蠻氛永靖朕嘉績酬庸經略大學士傅恆已晉封公爵所有中外在事諸臣或馳驅遠徼宣力封疆或夙夜在公懋襄機政宜加顯秩用獎勤勞太子太保大

學士來保著加太子太傅太子少保協辦大學士吏部尚書陳大受戶部尚書舒赫德太子少傅四川總督果毅公策楞太子少保陝甘總督尹繼善俱著加太子太保刑部尚書汪由敦著加太子少師吏部尚書達爾黨阿理藩院尚書納延泰俱著加太子少保其兵部尚書梁詩正協辦大學士刑部尚書阿克敦工部尚書信勇公哈達哈並久膺委任歷著清勤亦宜一體加恩以昭風勸梁詩正著加太子少師阿克敦哈達哈著加太子少保○諭據長蘆鹽政麗柱奏稱大軍凱旋辦理一切善後事宜官兵糧餉等項在需用其撥協軍餉之各省歲支俸餉亦所必需請照康熙十四年之例蘆東每引增銀五分並請敕令兩淮兩廣河東浙江等省一體按引增課等語此奏殊屬猥瑣鄙陋金川用兵供億固爲浩穰但國家當全盛之時無論已經降旨允降班師卽令尙在進兵

公帑所儲足數數年之用不至拮据且康熙十四年增加鹽課原
因開創未久三擘煽動兵連數省正供缺乏不得已而爲之旋即
復舊今時勢懸殊豈可援以爲例其近日議復米豆稅額則全不
爲軍興而然蓋自免稅之初卽有以利商而無益於民爲說者朕
念切民依堅持不允乃行之數年米價不惟不減且視舊益昂無
分豐歉騰踊如故則其果爲無益殆可槩見不若仍舊徵收以備
賑恤優免之用朕尙慮復稅後奸商乘機增價或致病民特旨詢
問管理關稅之人今據倭赫奏開徵一月有餘較前毫無增減足
驗米稅復額一事洵爲理勢之必當變通者朕辦理庶務悉斟酌
時宜一出於大公至正豈肯稍有假借規小利而起迎合之端而
眾人不能體會轉以其私利小見臆度觀望紛起言利豈朕而容
聚斂之說得以行於今時哉昨有唐綏祖倡捐養廉之奏朕已降

旨申飭今麗柱復以增課爲請是羣情之不顧大體競思懸擬此風斷不可長若不加懲儆將來效尤波靡習尙日益澆漓閭閻不無驚擾麗柱著交部察議罷兵之舉斷自朕衷卽此而觀非特民命國儲得以休養生息而於人心風俗亦大有維繫繫弓偃伯更何疑焉著傳諭中外知之○命銘化軍營新造大礮鑄錢○命舒赫德策楞兆惠清查糧運○戊子諭據巡撫方觀承具奏會同侍郎梅穀成審擬陳其凝任內生員樊顯自刎一案陳其凝身爲學政乃縱容伊子及家人書吏串通作弊訛騙婪贓藐法徇私莫此爲甚陳其凝著發往軍臺效力贖罪○諭本月初九日酉刻經略大學士忠勇公傅恆奏稱金川頭人阿申內附機有可乘棄之可惜懇展還朝之期初十日丑刻又奏奉到十六日諭旨敬謹遵奉於二十九日或初二日卽行星馳就道納降之事交策楞辦理等

語如此方爲明於事理能知輕重之大臣朕心深爲嘉悅罷兵一事朕再四熟籌爲國家遠大之計無逾於此蓋得其地不足耕得其人不足使逆則討之順則撫之乃天朝控馭蠻荒之道且地居奇險人力難施搗穴攻碉多戕物命況盡有其地旣未可列爲郡縣歸爲幅員則雖紮莎羅奔郎卡之頸致之闕下不過戮二番酋何足輕重而取其地以與他番何如卽撫此二酋使效順奉命朕初意猶不過欲乘其呼號請命因勢納降不謂其窮蹙若此恭順若此今據經略大學士傅恆前後奏報莎羅奔郎卡屢遣親信頭人致詞獻幣稟稱果貸其死當爲經略大學士建祠頂祝所約六條如不許再犯鄰封退還各土司侵地獻馬邦兇首繳出槍礮送還內地民人與眾土司一體當差一一如命且稱願較各土司分外出力是乃所謂革面革心而其望風稽顙不敢遽赴軍門者螻

蟻貪生之本念耳如此而必加以誅戮豈朕覆載包容之量所忍出耶王師不戰止戈爲武威旣伸矣功旣成矣班師振旅允合機宜息事甯人貽庥奕禩尙何可惜之有我國家正當全盛之時以東三省之遼遠烝徒萬騎而月而馳至四川誠昔人所云從枕席上過師者傳之史冊休有烈光今非此番辦理先聲震疊軍紀嚴明攻勦奮勇則賊番挺其螳臂未必若是之厥角歸誠此經略大學士傳恆之功視猷囚執馘者爲尤大也前此經略大學士傳恆屢以志期殄滅不肯遽歸爲奏朕甚爲懸切目下旣經翻然就道朕不妨宣示初心蓋予不可違父臣不可違君乃綱常之大義召之不至勢無中立非捐軀不返則必以違旨得罪夫以朝廷第一大臣而委命蠻荒成何國體軍前諸大臣及將弁士卒立視大帥之冒犯鋒鏑而不能衛尙可相率生還不懼國法耶設不幸而有

此後將作何收局若顧惜前勞固執成見遷延抗旨勢不得飢法姑容夫以負恩受戮之人尙不免爲之致惜況在忠誠效力之賢臣而以銳意立功罹於國憲朕心亦復何忍在經略大學士身膺閫寄報國心殷固宜以敵愾爲急朕培護元臣裁成開導俾祛偏見以宏遠謨而大學士卽能深體朕意不固執成見正合軍志所云允當則歸而調元贊化可爲數十年之良佐我君臣斯爲各盡其道則金川之役雖不無勞費而朕賞罰公明誅有罪而人知儆惕旌有功而人知勸勉庶績由此咸熙風尙由此丕變生靈由此阜安我大清億萬年無疆惟休豈勝慶幸著傳諭諸王滿漢文武大臣知之○庚寅諭軍機大臣等經略大學士忠勇公傅恆奏稱小金川打箭爐不必留駐官兵所見甚是朕前降旨時原因納降之舉不過隨宜收局尙須防範俾無侵軼今旣如此畏服如此恭

順並岳鍾琪之前赴卡撒及差役往來俱徑趨勒烏圍刮耳崖此與內地素附之土目何異則駐兵轉爲徒費物力是金川實屬平定經略大學士實已成功此際辦理事事巧於湊合初不料其順遂神速一至於此總由軍威克振先聲奪人可見辦事果能實心實力自有成效朕前降旨撤兵實慮經略大學士於兵齊之日或冒險輕進所以速令停止自今觀之則撤兵一事恰合機宜遲早之間無不中節深荷 上天孚佑有以默啓朕心惟佇待經略大學士星馳還朝同此欣慶也○諭朕前降旨將金川用兵以來在事大臣及隨營文武官弁人等與有勞績者交部從優議敘今據四川總督策楞奏稱從前訥親張廣泗老師糜餉虧損軍威將弁等征戰出力之處並未存檔案若行文各將弁查報必多捏飾徒滋冒濫等語訥親張廣泗自經任事毫無實心其所奏報多屬子

虛是以諭令軍前確實查辦今既稱並無冊檔可稽則該部無憑
置議所有官弁人等優敘之處似可不必但卽此而觀訥親張廣
泗於有功者旣漫不經心茫無紀載則其所參有罪者亦必顛倒
任情多屬屈抑著該督策楞詳悉查明量予昭雪據實奏聞請旨
其陣亡將士仍遵前旨查奏交部議卹○侍衛鄂實奏正月二十
九日行至班攔山接奉諭旨將訥親正法訖報聞○辛卯 上御
經筵○壬辰諭本日據經略大學士忠勇公傅恆奏報天威遠暢
平定金川莎羅奔耶卡俯首就降獻捷班師露布馳上莎羅奔耶
卡於二月初五日設壇除道帶領喇嘛頭目多人焚香頂戴作樂
跪迎經略大學士忠勇公傅恆輕騎減從示以不疑該酋虔候升
帳先匍匐稽顙經略大學士傅恆開誠訓飭義正詞嚴因見番酋
悔懼哀籲之誠溢於顏面宣布朕旨示以德威宥之不死該酋始

則戰慄震悚繼則感激歡欣致詞懇切永誓不敢再有違犯呈獻
古佛一尊銀萬兩經略大學士傅恆受佛卻銀頒賚恩賞手授荷
包莎羅奔膝行領受叩首稱銀兩不敢領回願卽以此爲經略大
學士傅恆建祠誦經子孫戴德經略大學士傅恆遣令回巢遠近
諸番觀者如堵莫不踴躍欣喜敬信畏服嗣是遠徼牧甯蠻氛盡
息生靈休養食德飲和大清國億萬年無疆之休垂諸史冊盛烈
光昭朕聞報不勝欣幸此皆 上蒼孚佑 宗社貽庥有以默相
朕躬 皇太后懿訓詳明有以啓迪朕志荷茲福庇感慶實深經
略大學士傅恆丹衷壯志勇略宏猷足以柔懷異類迅奏膚功卽
諸葛之七縱威蠻汾陽之單騎見虜何以加茲實爲國家嘉祥上
瑞前已晉爵封公酬庸更無殊典所賜四團龍補褂著祇受服用
再照元勳揚古利額駙之例加賜豹尾槍二桿親軍二名優示寵

章均不必懇辭此外尙有黃金帶寶石帽頂俟抵京伊邇朕遣大阿哥往迎時頒賜至提督岳鍾琪能承經略大學士傅恆指示開誠布信直造賊巢用致番酋弭耳惕息厥角恐後成勞茂著功在諸將右著加太子少保仍交部從優議敘其參贊諸大臣及在營大臣等雖前經議敘而此番殫心宣力均屬可嘉著再行交部議敘此事去歲之徵兵命將與今歲之決策班師朕初意第以隨宜收局不料番酋畏威懷德革面革心一至於此固朕宵旰憂勤事無大小先幾籌畫恰合機宜亦由經略大學士傅恆秉心忠亮克承訓示成此殊勲可見作善者昌將來數十年贊化調元懋襄邦治實嘉賴焉著傳諭諸王滿漢文武大臣並宣示中外知之○傅恆奏金川番酋震懾投誠於正月二十日遣頭人呈獻甘結遵依六事一永不取侵擾諸番一供役比各土司貺勉一盡反所奪鄰

番地一向來誤犯天兵兇首擒獻一送還從前侵掠人民馬匹一
照數獻出槍礮軍器臣以元兇未經面縛峻拒其請賊勢益窮轉
乞綽斯甲土司求提督岳鍾琪代請貸死於二月初四日土司莎
羅奔土舍耶卡於軍門外除道設壇次第俯伏帳下臣宣布國威
承旨赦罪遣令同巢觀者如堵萬聲懽慶得旨覽奏忻悅之外無
可批諭更有明旨頒發諸王大臣知之岳鍾琪奏金酋負險自大
帥臣仰稟廟謨軍威大振窮蹙乞命臣帶兵四五十人進抵賊巢
迎謁甚恭是夜卽宿勒烏圖明日至其經堂令綽酋搆結同莎羅
奔耶卡依番禮誓於佛前隨赴卡撒告知經略後至巴耶帶領該
土司土舍膝行叩降得旨此事固經略大學士之忠誠至於能承
大學士之指示開誠見賊致彼不疑而來亦卿之功也甚慰甚嘉
許之○甲午諭大學士張廷玉來保等以金川蕩平膚功迅奏由

朕指授機宜應垂方策請照 皇祖聖祖仁皇帝平定朔漠纂修
方略之例編輯成書朕惟金川一役原非好大喜功此番奏凱班
師仰荷 天 祖默佑貽慶無疆而元輔之抒忠奮勇將士之敵
愾騰歡有以震懾蠻方廓清荒徼朕非自詡其功欲以鋪張誇耀
第軍旅爲國家大事其端委曲折非紀載詳明無由考稽且 聖
母皇太后懿訓之慈祥愷惻朕於此事始終經畫之宵旰焦勞不
可不垂示後嗣子孫俾共喻保大定功之艱止戈爲武之義著照
所請行○軍機大臣等奏 聖祖仁皇帝平定沙漠 世宗憲皇
帝平定青海均 御製碑文垂示久遠金川平定恭請 御製文
勒石太學從之 御製平定金川告成太學碑文曰 天畀我皇
清握乾符俯坤軸函括萬邦悉主悉臣 五后繼承創守佑啓亦
惟是二三盡臣布德宣力予曰有先後予曰有禦侮用造我不丕

基罔有桀芽罔不煦嫗長養游於太和粵有金川莎羅奔者居西
蜀桃關以外界綽斯甲小金川之間向會從征得受符檄與諸土
司齒顧恃其險遠夜郎自大構釁鄰番各土司申訴封疆吏吏曰
蔓之不圖豈其視爲甌脫乃請兵籌餉期埽其穴而司其事者或
怯縮以老師或獍狫以蓄志軍無適從事用弗集予心惻然念邊
徼之不甯或致增防置戍重勞吾民大學士忠勇公傅恆義同休
戚毅然請肩斯任乃命以經略印益厚集諸路軍芻粟相繼閭閻
不驚卜吉於戊辰十一月之三日 禡牙以指所征朕親御武帳
賜經略酒以行天日和昶陽氣宣復都人士聽觀聳躍罔不怵喜
謂露布之旦暮至也乃厯燕晉驅秦隴越劍閣絕川江陵桃關之
熾徑天赦之峻又日討軍實而教誡拊循之均其渴飲饑食同其
曉征夜眠至於密贊機務親草奏章則又經略獨勤其勞而諸武

臣有所不知有弗能共者恩威旣明士用益勵度番落如戶庭過部伍於衽席奸酋授首軍聲大振復以巨礮擊其碉堅碉以摧將俟諸軍之集搗其中堅而番酋駭駭喙稽首請降經略臣以彼罪重惡極窮而乞生久或淪且徭焉慮不允所請朕惟天地之德在好生彼蠭潰而鼠駭者毋甯赦而有之且求降而盡殲之不可謂武矧不足以汚我斧也於是經略宣朕明旨登壇受降己巳二月之望日金川平定捷音至京是役也架入數千里奏凱未七旬而振旅之師多有返在中途未究其用者昔之成功巴蜀如建武之定公孫江陵之降李勢皆在版圖之內無足比數廷臣舉皇祖朔漠皇考青海成例請勒碑成均以示來許夫秉丹誠而運籌決勝永靖荒徼者經略大學士之功也商可否於帷幄衝矢石於行陣者參贊大臣及諸將士力也朕何有焉惟是體乾元之德

懷佳兵之戒保大定功安民和眾庶幾可以垂則乎乃繫之辭曰
維天生人類聚羣分凡茲林林孰非我民有羈而縻有誨而諄豈
伊異視遠近殊倫守在四夷稽古名言無已用之寓義於仁蠢彼
金夷恃其險阻蠶食猘張謂莫我拒不靖不庭侵厥鄰聚駭奔叫
呶以干大咎匪棘匪紆獫狁之故我張我伐獫狁之故我師既集
賊亦相持匪敢相持懼誅自支兩易寒暑敕功稍稽賊益以狂怒
臂當車罪臣既誅以徇我師朕咨於恆汝往視之朕咨於恆惟汝
同德惟我庶士亦久于役將茲旗兵羽林神策其勇能罷其心金
石何敵弗摧何攻弗克濟以汝忠奏捷頃刻恆拜稽首臣敢弗獲
旌獵獵有節煌煌羣番乃驚謂自天降惟彼攸恃曰良爾吉以偵
以謀如鬼如蜮其恃爰誅其類股慄紀律是明戎兵是詰鑄礮攻

弼其守以失惟是懼誅潛弗敢出其潛弗出乃旦夕延將齊我軍
披其中堅大鞬大膊期日之前彼乃窮蹙乞降悚虔惟命是從六
事永遵除道築壇肉袒羊牽赳赳鍾琪乃度之愬聿抵賊巢開誠
以諭攜其二酋軍門親赴悔罪歸誠車塵馬足順斯撫之昭我王
度昔也雷霆今也雨露七縱諸葛單騎汾陽曰我相臣于前有光
晉爵賜服黼黻龍章速歸黃閣左右贊襄休養生息惠鮮蜀邦我
武旣揚無疆惟慶○丙申諭金川奏凱大功已成而始事之輕遽
則紀山究難辭責至於班第固係專辦糧運而其奏請重臣督師
居心亦不可問是伊二人情罪雖與張廣泗訥親有閒未便照張
廣泗之例以處紀山照訥親之例以處班第然均有過無功豈可
置之不論今若槩從寬典仍令回京或授爲副都統侍郎之職伊
等亦有何顏與在廷諸臣同列班行且返衷自問諒亦難安而眾

人見紀山班第之負過重而受罰輕將來遇有軍國重務卽不肯力任艱鉅亦不至身羅重典惟思巧圖僥倖苟免自全實無裨於國事朕思紀山曾經駐藏班第亦頗諳夷情俱著賞給副都統銜自備鞍馬紀山前往西藏換回拉布敦辦理部務班第前往青海換回眾佛保來京另用如此則旣開其自新之路亦足以儆戒將來朕於臣工功罪賞罰一秉大公至正從無絲毫假借亦無絲毫容心紀山班第見有經手事宜尙須留辦著總督策楞酌量俟伊等諸事清結卽令由川起程各赴駐守之地○以李因培爲內閣學士由翰林院侍讀學士遷○庚子命舒赫德查閱貴州雲南湖南湖北等省營伍會同湖廣總督新柱履勘雲南金沙江工程○以瑚寶署湖廣總督由兵部尙書署○辛丑諭原任禮部侍郎沈德潛前令其帶原銜食俸在阿哥書房行走今年近八旬精力益衰著以原品休致

○禮部奏國家飾終之典所以報功獎勞向來公侯伯子男閒散世爵照內外交武大臣例題請贈卹諡葬止因官階及格並無勞績仰祖父之蔭一體邀恩殊未允協嗣後不兼他職行走者但給一次致祭銀兩兼者應給與全葬並賜諡之處兩議題請候旨俟命下交會典館載入從之○壬寅四川總督策楞等奏金酋呈繳器械礮位送還內地民人縛獻兇首當將所獻番民訊明各土司所屬分領官兵押發原籍不准入伍器械酌給新兵以備差操餘與礮位送省又據稱馬邦作惡頭人耶多阿耶係起禍之原請於番眾前正法卽委員驗實梟示下部知之○甲辰命策楞岳鍾琪分賞各土兵銀米○乙巳諭軍機大臣等前據策楞奏稱訥親應賠之項伊同愛必達阿里衮每年願交銀二萬兩等語策楞愛必達阿里衮三人雖同屬訥親弟兄同爲督撫而策楞則原係御前

侍衛深知其可用特行簡拔初非因訥親而加委任至愛必達阿里衮則因其爲訥親之弟其人尙有出息是以特加擢用伊等返裏內問其分量甯不自知及訥親獲罪以後策楞之慚慙愧憤見於顏面其辦理軍務及地方事宜悉能實心實力坦白自將毫無觀望猶豫深得大臣之體而愛必達阿里衮於訥親之事從未見其懇切瀝陳不無心懷疑惑辦理諸事均覺畏首畏尾夫父子罪不相及何況兄弟朕於臣工功罪賞罰一出於大中至正不存絲毫成見愛必達阿里衮若因訥親正法少有怨望則罪不可貸然朕亦諒其不敢出此惟是識見卑小自信不及因而辦事之處亦不能如策楞之爽直奮勉卽此一端已宜加以薄罰伊兄弟三人所有每年認賠二萬兩之數著減去五千兩令愛必達阿里衮按年措交銀一萬五千兩其策楞名下免其代賠並將此旨詳悉傳

諭以示朕教導成全之意○命四川清查漢奸○丁未諭軍機大臣等策楞奏稱莎羅奔耶卡感朕宥死之恩選進番童番女十名代伊等服役已專差送赴經略大學士忠勇公處又見在刮耳崖修建祠宇供奉經略大學士忠勇公長生祿位兩酋此番向化實出至誠但伊等更生固朕曠蕩之恩亦由經略大學士忠勇公傳恆忠誠辦理之所致生祠自應聽其建立至番童番女理不當留已令總督策楞量加獎賞可傳諭經略大學士忠勇公將所送幼番卽發還成都交策楞傳令該酋領回○諭金酋莎羅奔耶卡因不能赴闕謝恩選進番童番女代伊等服役等語伊等既經納款盡其部眾皆所隸屬何必留此齟齬無知之幼番應傳諭總督策楞俟經略大學士傳恆將番童番女發到之日卽宣朕敕諭令其領回莎羅奔耶卡既實心向化似尙知道理非冥頑異類可比著

量加獎賞以示柔遠之仁敕諭一道並發令通事告彼聖旨係特
命章嘉呼圖克圖所譯恐此閒所譯不能盡悉聖意爾等應欽遵
弗諉永安荒徼諭金川土司莎羅奔前因爾等罔遵法紀侵擾鄰
番地方大吏請旨興師問罪而在事大臣訥親張廣泗種種辦理
不善致爾等情曲無由上達朕已將伊等軍法從事特遣大學士
傅恆前往經略大學士秉志忠誠勇略素著乃中朝第一親信大
臣果能振揚威武申明紀律且洞悉爾等控訴之隱情深鑒爾等
歸誠之夙願據實入告朕體上天好生之心憫爾等無知觸法俯
允納降今據總督策楞奏稱爾等感激天恩因莎羅奔年老龍鍾
耶卡未經出痘不能赴闕叩謝謹進番童番女代爾服役等語外
番蒙古部落甚眾未出痘者槩不令來京此天朝定制耶卡原不
應來莎羅奔衰老不能遠涉不來亦是至爾等之地皆皇朝之地

爾等之人皆皇朝之人爾等在本境稽顙叩謝與親赴闕延何異
番童番女長育本境亦與參養內地何異爾等慕爾番蠻本不足
當皇帝親降諭旨因爾等實心向化欲親赴闕謝罪是以特加曉
諭並交總督酌量獎賞爾等其敬謹遵奉安分守法勉力嚮善皈
依佛教各守封疆永無侵軼嚮化各土司亦斷無侵擾爾等之理
設各土司有欺陵爾眾者許控告總督提督爲爾等分割曲直毋
得輒肆爭鬪所有番童番女俱著總督策楞發交領回以示柔遠
撫順至意特諭○賜陣亡總兵任舉子承恩銀五百兩○戊申獎
諭四川隨征各土司並賞給軍米○是月雲南巡撫圖爾炳阿奏
金沙一江與黃河同發源星宿海經流萬里始入滇境又五千里
與岷江合禹迹未經功遺疏鑿今以前代所不能開通者一旦底
績民生利賴均奉睿謨莫險阻爲坦夷聯滇蜀爲一氣爰分門別

類纂成金沙江志二十二卷得旨知道了書留覽

三月辛亥 上親耕藉田○癸丑經略大學士忠勇公傅恆凱旋

命皇長子及裕親王等郊迎○甲寅召武柱來京以定長爲西安

布政使高晉爲山東按察使由山東運河道遷○乙卯 上奉 皇太后

至靜安莊 孝賢皇后梓宮前臨奠○諭軍機大臣等據山東學

政李因培奏東省連遭荒歉今春雨暘應候二麥滋長而天恩疊

沛所有積欠久令分年帶徵然僅及有田有糧之人而貧者未能

沾溉請於將屆麥秋特頒諭旨令撫臣廣行勸諭有田者將本年

糧粒與佃民平分積年宿逋不得一槩追索等語佃民終歲勤動

固宜體恤東省積欠之後尤應加意培養但有田之戶經營產業

納糧供賦亦圖自贍身家豈能迫以禁令俾其推以予人况佃民

多屬貧無聊賴其中賢否不一豐收之歲尙不免陵其田土抗負

租息今若明降諭旨令地方大吏出示飭遵在田主旣不能強以必從而頑佃更得藉端抗欠甚至紛爭鬭毆獄訟繁興田主懲前戒後勢將收田另佃貧民轉致失所是欲以施惠而適以長奸欲以恤貧而適以貽累地方有司奉行不善徒以是爲沽名邀譽之具而刁風由茲漸長不可不爲遠憂也朕意他省固未可通行惟東省前年被災較重元氣一時未復且國家尙緩其積欠則田主亦可推惠於佃戶暫爲權宜變通然亦止可令州縣官斟酌情形善爲開導使有田者好善樂從佃民得沾惠濟似亦因時補救之一道著傳諭準泰詳加酌量妥協籌辦毋急速以滋擾累毋粉飾而事虛文務期農佃相安用收睦鄰任恤之效並諭李因培知之以擴其識見○諭據潘思渠奏稱閩省民風不靜半在私藏軍器請將通省各府州縣烏槍腰刀長槍藤牌等類勒限全數交官永

遠不許製造等語民間私藏軍器原有例禁但地方幅員遼闊戶口繁眾收藏軍器爲數必多豈能一時清查況有司奉行不善授權胥吏勢必逐口搜索藉端擾累刁悍之區轉以抗違滋事且閩省山海交錯匪類易於潛藏人民聚族而居不無賴軍器以資守禦此亦該省風俗使然若慮其習熟技勇動輒械鬪亦止可先時詳爲化導臨時嚴加懲處飭令追繳如欲過爲厲禁不幾如吾邱壽王所云邪人挾之而吏不能止良民以自備而抵法禁是擅賊威而奪民救者乎潘思榘此奏不過謂伊於地方能留心辦理此一事耳其是否可以通行無礙及行之有無實效之處恐未經轉及著傳諭令其斟酌妥協務期安靜無擾毋得驚駭物聽能發而不能收也○敕建大學士公傅恆曾祖哈什屯祖米思翰父李榮保宗祠○丁巳 上親率經略大學士忠勇公傅恆詣 皇太后

宮問安○諭金川平定邊徵牧甯實由大學士忠勇公傅恆克振
國威殊勲茂著而提督岳鍾琪聽大學士指示克集厥事其功可
稱其次今大學士公傅恆凱旋陛見據稱臣雖勉效馳驅而番酋
歸命悉仗天威至於歷練戎行信孚蠻部深入賊巢膽勇雄決則
岳鍾琪洵爲克勝委任此因出於大學士公傅恆之讓能推美然
岳鍾琪之奮往任事實屬可嘉已降旨晉階太子少保交部從優
議敘伊前於青海奏捷曾封公爵茲復樹績蠻方收桑榆之效著
再加特恩授兵部尙書銜於本身封爲三等公以昭錄功懋賞之
典俾宣力疆場者知所勸焉○戊午諭大學士公傅恆今旣回朝
自應仍兼管吏戶兩部事務但大學士承辦公事繁多勤勞過甚
精力亦宜節養著照大學士伯張廷玉從前辦理部務之例止畫
題案所有各行案件各該堂官皆可辦理不必閱看其戶部事務

海望不必署理○己未

孝賢皇后小祥

上至靜安莊梓宮前

致奠○論訥親從前於金川軍務支用過養廉賞資及建碯銀兩經戶部題明作十倍賠補續又據尙書舒赫德查出訥親濫用銀兩米石及一切冒支之項均應照前例著落伊兄弟名下追賠前據策楞具奏每年願同愛必達阿里衮共還銀二萬兩朕以策楞辦理諸務能實心實力坦白自將毫無觀望加恩免其還繳令愛必達阿里衮按年交清今思巡撫雖有養廉而應辦公事亦多設措賠項未免拮据朕念伊等祖父曾與國家效力兄弟兄罪不相及愛必達阿里衮應賠銀兩著一體寬免此朕格外之恩伊二人更當殫心職業力圖報稱如稍有疑慮因循不克勉矢真誠之處不能逃朕洞鑒是伊等無福承受恩典矣○庚申 上幸瀛臺御紫光閣行飲至禮賜經略大學士忠勇公傅恆及隨征將士宴

於豐澤園○辛酉 上以平定大金川謁 陵啓鑾○大學士等
議四川總督策楞等奏辦善後事宜十二條一巴底巴旺各立土
千戶責令革布什咱管轄查巴底巴旺係土司納旺轄以投金酒
圈禁今莎羅奔郎卡既邀恩免納旺罪非不有遽將所轄地令革
布什咱管理無端爲益部落不足服所屬番民且恐納旺姪勒兒
悟爾結噶杜爾結長成爭地滋釁應釋納旺仍令管理以次承襲
一土司向係該管官加結到部查給號紙金川新定革布什咱地
與毗連亟須彈壓扎什諾爾布從軍出力應卽給號紙以示獎勵
一雜谷革布什咱沃日小金川四土司宜聯爲一氣查該土司等
壤接金川屢被侵占今旣還侵地自可息事甯人卽思患豫防應
聽該番自籌旣傳集曉諭伊等頂經發誓辦理完結無庸議一小
金川沃日宜結婚媾協守疆圉查沃日向係土女澤爾吉轄已據

眾土司議與澤旺婚配無庸更議一沃日印務請仍令澤爾吉護
理查澤爾吉雖配澤旺仍管沃日應令照常約束生子照明正司
土婦功噶例分襲兩土司一小金川被毀碉房宜督修孫克宗占
固二處宜駐防查碉房與要隘應聽自修自守若委員督修分駐
恐莎羅奔等聞知疑懼或已辦理亦不可張皇滋事一小金川大
小朗素宜分別安插查小朗素見奉旨詢問大朗素秉性好頑又
未出力酌看情形安插一土舍汪爾吉應暫爲安插查該土舍原
係郎卡異母弟兄先來投誠今事竣不能回巢應交伊母舅扎什
諾爾布帶赴遊牧俟有可安插處奏請一梭磨卓克基黨壩土司
土舍宜加銜獎勵以分雜谷之勢查各土司與雜谷本弟兄受制
雜谷相隨從征效力今遽加以安撫司等職銜則率先之雜谷既
恩無可加轉將伊所轄地瓜分鼎立相形輕重失宜卽慮部落過

大應俟一二年後熟籌請旨一各部土司請加級以示鼓勵查各
土司恭順辛勤業加恩旨賞賚格外獎勵事屬可行應請交部一
嚴漢奸出入番地之禁查漢奸本應查防但各土司錢穀文移須
人代辦自行延請則去留自由而字識往來無關輕重若一切取
結詳報備案地方官勢難兼顧其願充者必非安靜守法之人挾
經官選擇之勢更恐滋事至定以年限給以職銜求充者益多與
該土司稍有齟齬赴內訐告不便據以爲實又不便不問應遵前
旨漸次嚴密稽查不必多爲禁約難於遵守至番民貿易原難禁
絕惟在員弁嚴察匪徒出入一夷民典買漢地應贖歸以分疆域
查木坪瓦寺兩土司緊接內地典買漢地甚多營業已久遽行追
贖轉似奪伊恆產應嗣後嚴禁內地民人不得將田地私售番民
違者治罪得旨依議速行○甲子 上謁 昭西陵 孝陵 孝

東陵 景陵○丁卯 上幸南苑行圍○庚午大學士等議覆各

省督撫查奏米貴之由熟籌補救雖因地制宜各有不同而爲常
平買穀請緩請停者大半應遵前旨以雍正年間倉貯舊額爲準
通計減穀千有餘萬石民間卽多此數流通美利周溥存糴之法
又經議定平買貴停可不致昂米價其請捐收本色亦因採買妨
民借資酌濟至開墾疏濬以興利通販禁囤以濟乏躉麴燒鍋並
行禁止均經辦理毋庸另議從之○辛未賞四川效力各土司軍
營餘米一萬六千餘石○癸酉 上謁 泰陵回鑾○定上駟院
奉宸院武備院卿缺各二員○丙子 上還宮○丁丑諭直隸河
道事務近年以總督兼理不過於伏秋汛至之時往來率屬防護
工程俱已平穩所有直隸河道總督不必設爲專缺卽於總督關
防敕書內添入兼理河道字樣其一應修防工程向係河道等承

辦者俱照舊飭委辦理見在纂修會典將此載入○停川運捐例
夏四月己卯刑部尙書汪由敦等奏本月初九日頒發恩詔所有
金鳳朵雲應卽備用禮部儀注應添入工部先期設金鳳於天安
門上正中設宣詔臺於門上東第一間詔由午門出迎至天安門
上城聽詔百官耆老等分翼排班於金水橋南跪聽宣詔官宣讀
畢鴻臚寺官贊行三跪九叩禮捧詔官將詔置朵雲內綵繩懸繫
由金鳳口銜下禮部官接受置綵亭內迎出東長安門所有儀節
請交禮部遵照載入會典得旨是○壬午冊封嫺貴妃那拉氏爲
皇貴妃攝六宮事冊封嘉妃金佳氏爲貴妃令嬪魏佳氏
爲令妃舒嬪葉赫勒氏爲舒妃貴人陳佳氏爲婉嬪○甲
申以高晉署兩淮鹽政王師署山東按察使由直隸天津道署○乙酉加
上皇太后徽號曰崇慶慈宣康惠皇太后○戊子上臨和

敬公主第視疾○辛卯禁各海口銅器出洋○壬辰命張師載以

倉場侍郎銜協辦江南河務以彭樹葵爲倉場侍郎調唐綏祖爲

湖北巡撫以阿思哈爲江西巡撫起張若震爲甘肅布政使

原任浙江

布政使

○乙未諭護理兩淮鹽政運使舒隆安奏稱准漕臣蘊著札

開奉 上諭嚴查吉慶所置私產令奴才卽刻確訪私蓄寄頓據實
密覆以便回奏其見在署中一切家貲雖未奉旨查看自應密爲
防範勿使稍有走漏奴才密委揚州府知府曹涵小心防範不致
走漏等語聞之不勝駭然蘊著去冬參奏兩淮鹽政吉慶聲名狼
藉眾怨沸騰臚列款單賊私纍纍朕意吉慶若果如此則罪無可
逭乃該督撫未經奏聞而蘊著能不避嫌怨據實密糾方以國家
又得一公正大臣爲喜但思吉慶係一聰明伶俐內府之人其家
產素豐人所共知卽在任婪贓所得必不及其所素有豈肯貪得

其少者而並失其己資之多者吉慶愚不至此他若無足輕重之陋規便宜得之而無害者吉慶必不能不取此語自去年蘊著參奏之後時與軍機大臣等言之因批示蘊著云若如汝所稱吉慶婪贓之款則其家產當至巨萬汝若知其確有所置私產據實速奏蘊著覆稱吉慶有無所置私產奴才實未知有確據以此搪塞回奏是朕之批示乃係疑吉慶婪贓尙在有無之間第令其細查密訪而已乃蘊著於奉旨來京與吉慶對質之時忽以奉旨嚴查吉慶私產之語札致運使且將任所家貲一併看守不知蘊著奉何時諭旨公然如此辦理悖謬已極如以爲錯會從前諭旨則應於初奉諭旨時確查乃旣經蒙混具奏至今始札行運使明係因吉慶離任以此快其報復其矯旨挾私妄行擅作威福實出情理之外非意料所及且蘊著身爲總漕又係宗室乃與商人往來親

至商人家中深爲有玷國體又據吉慶奏蘊著與彼處程姓商人相好曾向屬託未允照應去年查張廣泗寄頓會傳程姓商人到揚質問而蘊著不知端委見吉慶傳訊伊素相交厚之人恐於伊有礙是以騰章入告於歲暮馳奏有此情節吉慶見已解任蘊著著卽革職派莊親王裕親王會同軍機大臣等審明具奏○召長柱來京以卞塔海爲盛京工部侍郎由太常寺卿遷○戊戌以瑚寶爲漕運總督調哈達哈爲兵部尙書以三和爲工部尙書納穆扎爾爲戶部侍郎由副都統遷○己亥諭江西營伍向係兩江總督所轄去頓

州南昌二鎮甚遠未能詳悉周知時加簡閱是以日漸廢弛巡撫阿思哈著兼提督銜令其就近管轄加意整頓仍聽總督節制○庚子諭公恆祿見在管理武職於部務難以兼顧其工部侍郎員缺著安徽巡撫納敏補授恆祿仍暫代拉布敦管理俟拉布敦到

日再專辦本職事其安徽巡撫員缺著衛哲治補授山東布政使

員缺著崔紀補授

崔紀原任湖北巡撫

○諭前任知府尤拔世因伊弟安甯

向係同居一併革職但思兄弟罪不相及卽如訥親身罹重辟而

策楞愛必達阿里衮任職如故朕之用人一本大公至正毫無成

心尤拔世著仍補授鳳陽府知府○丙午諭 堂子之祭乃我朝

先代循用通禮所祭之神卽 天神也 列祖膺圖御宇旣稽古

郊禋而燔柴典重舉必以時 堂子則舊俗相承遇大事及春

秋季月上旬必祭 天祈報歲首最先展禮定鼎以來恪遵罔怠

且不易其名重舊制也考諸經訓祭天有郊有類有祈穀祈年禮

本不一兵戎國之重大事故命遣大將必先有事於 堂子正類祭

遺意而列蠶行禮則禡也我 祖宗於行營中或別有征討不及

歸告 堂子則望祭而列蠶行事其誠敬如此朕思出師造遣則

凱旋卽當告至乃 天 地 宗 社俱已祝冊致虔且受成太
學而 堂子則弗之及祠官疏略如 神貺何祀典攸關彝章宜
備著議政王大臣等詳悉具儀朕親爲裁定載入會典特諭尋奏
謹按會典崇德間大兵凱旋 太宗文皇帝率眾拜 天大設筵
宴宴畢 躬率凱旋王貝勒貝子公大臣等恭謁 堂子行三跪
九叩禮請嗣後凱旋致祭於 天 地 太廟 奉先殿 社
稷 陵寢如常儀外 皇帝告祭 堂子由禮部請旨欽天監擇
吉屆期鹵簿大駕全設禮部堂官奏請 皇帝詣 堂子行禮凱
旋將帥大臣及諸王貝勒貝子公鎮國將軍都統尙書等官隨行
皇帝進 堂子上香畢禮部堂官恭導就位凱旋將帥等依次
排立鳴贊官贊跪叩興 皇帝行三跪九叩禮將帥等隨行禮畢
禮部堂官奏請駕還宮樂作禮成如儀得旨是依議○諭金沙江

一事近據圖爾炳阿奏到其所指情形尙不無迴護然所稱灘險難行銅沈船損終歸無益之處已屬顯然大槩山川形勢天險非人力可施亦猶金川碉樓奇峻欲以兵威所至剗而平之徒勞何補此是一定之理金沙江工役將來查勘確實亦不出此但其事始末朕知之甚悉蓋其初不始於張允隨倡其說者大學士鄂爾泰率先贊之者慶復而朕亦因銅運艱難諸臣備陳開江之利期於一勞永逸降旨交辦令勿畏難中阻張允隨身臨其地若果見爲無益自當抗議力爭以爲不可然此乃大臣秉正不撓之節張允隨承望風旨依違遷就咎所難辭但尙屬人情所不免今大學士鄂爾泰物故已久朕眷舊加恩保全終始豈肯因此事而追斥前愆罰及後嗣卽張允隨雖係承辦總任之員將來查出工程不實亦不必革職查產止須令伊及在工人員如宋壽圖等照數著

賠便可完結蓋伊在滇數載辦事尙屬妥協且一時未得更代之人故令在任彌補較易爲力而從前工程糜費帑金終於毀廢如楚省舵桿洲之類亦不一而足固非貽誤軍國罪不容逭者可比朕辦理諸務一本大公至正已另旨傳諭張允隨伊亦必中心允服圖爾炳阿摺著寄舒赫德新柱令其知悉舒赫德自川省奏報起程之後許久未見奏摺途次佳否節物數種寄賜新柱亦已起程未知何時至敘州會合同行遇便奏聞○議政王大臣兵部議奏出師告捷典禮臣等考究前史參采見行事例並大學士公傅恆原奏區別四款曰命將曰徂征曰專閫曰奏凱又於四款中酌定授敕以迄勞師計儀注十有二則一授敕印經略大將軍出師

皇帝臨軒王公文武百官朝服侍班頒敕印於太和殿經略大將軍率隨征諸將於丹陛上跪受行禮如儀二祔社經略大將軍

出師先期告祭 奉先殿及啓行日 皇帝率經略大將軍隨征諸將詣 堂子行禮鳴角吹螺祭纛於門三祖道經略大將軍啓行 乘輿親餞於長安門外賜卮酒佩弓矢上馬文武大臣承詔送至郊外有司具祖帳及宴禮兵二部堂官奉茶望闕謝恩乃行四整旅凡隨征參贊大臣均奉 欽簡外護敕印官內閣學士一人中書翰林院筆帖式各二人記室官四人戶兵二部司官各一人刑部理事官一人如蒙古地方則委理藩院官一人應隨侍衛仍候 欽定經略大將軍前隊列 止賜軍械次列令箭十二支次列敕印護敕印官隨行經略大將軍乘馬後建大纛參贊大臣及司官侍衛等隨纛行又次以十二標旗大隊軍旅殿五守土官相見經略大將軍所過地方守土官將軍督撫文官司道以下咸蟒袍補服武官總兵以下披執率兵列陣跪迎提督副都統近前

問安經略大將軍升廳正坐將軍督撫旁坐文官司道武官提督副都統以下行庭參禮至起行時將軍督撫以下各官候送如前儀六封章拜詔凡封奏營門鼓吹聲礮在營弁丁兩旁肅立記室官奉奏函置案上經略大將軍行三跪九叩禮畢兵部司官奉函由中道授臺站齋馳若詔書至營鼓吹聲礮如前儀兵部司官接篋置案上經略大將軍行三跪九叩禮受篋啓閱如欽差大臣到營經略大將軍率在營大臣等離營三十里迎候請 聖安守營官導引並馬進營欽差大臣宣旨畢經略大將軍正坐欽差大臣按品級坐欽差大臣回京經略大將軍率所屬離營候送請 聖安如前儀七升帳接屬凡軍營設大幕惟經略大將軍近侍官暨辦理軍機有職掌者准令出入餘官均幕外祇候議事時經略大將軍正坐參贊大臣及一品官僉坐有問則起立致詞提鎮等官

稟事由傳宣官轉達令入則引進令坐則向上僉坐凡參贊大臣
一品官入見於營門內下馬餘官於營門外下馬由角門出入如
經略大將軍下設有將軍者相見照參贊大臣一品官儀若外藩
部落謁見幕外官均進幕肅立直班弁兵按汛肅立軍門鼓吹聲
礮經略大將軍升坐外藩跪稟辭畢卽引出各官兵咸退入簡閱
營伍經略大將軍起行軍門鼓吹聲礮守營大臣及官弁離營里
許候送首隊齎敕印前行十二標旗隨後周巡提鎮等官屯營之
處每至一營兵官離營一里外迎候經略大將軍閱過提鎮等率
所屬弁兵隨行離本汛乃止九獻俘經略大將軍告捷解俘至京
欽天監擇吉獻俘於 太廟 社稷壇至期兵部率解俘官兵以
白組繫俘頸由長安右門入進天安右門至 太廟街門外嚮北
立候告祭大臣至令俘嚮北跪告祭大臣進 太廟行禮畢兵部

率解俘官兵押俘至社稷衙門外令俘仍嚮北跪告祭行禮如前儀獻俘次日皇帝御午門樓王公百官朝服侍班鐃歌大樂金鼓全作兵部堂官跪奏請旨有制宣刑部刑部堂官跪領旨押俘出天安右門王公百官慶賀聽贊引禮十受降凡經略大將軍受降飛章入告得旨允降乃大書露布傳示中外築受降壇於大營左壇方南嚮距百步樹大旗書奉詔納降字降者至兵部司官引立旗下經略大將軍出營鼓吹聲礮參贊大臣各官隨行降者於旗旁嚮北跪匍伏經略大將軍登壇參贊大臣及一品官分翼僉坐隊伍將領等官分翼立其餘官兵分班排立兵部司官引降者抵壇前匍伏乃宣諭德音酌加賚賚聲礮鼓吹降者泥首伏謝而退十一告成凡奏凱告成致祭天地宗廟陵寢釋奠於孔子勒碑太學羣臣恭進賀表並請編纂方略以垂奕禩十

二勞師凡師旋將入城遣廷臣出郭迎勞經略大將軍還朝謝恩
皇帝御殿設鹵簿王公百官齊集如儀鴻臚寺官引經略大將
軍從征各官於丹陛下繳敕印行三跪九叩禮畢 皇帝還宮翌
日賜宴頒賞進爵有差以上各條應請飭交會典館纂入軍禮從
之

五月戊申朔諭朕於 兩郊大祀先御齋宮以齊一思慮聞之記
曰齋者耳不聽樂孔子曰三日齋一日用之猶恐不敬二日伐鼓
何居言不敢散其志也今齋宮宵漏下鳴鳶角嚴鼓以爲節雖異
於宮懸合奏而吹角鼓鑿軍中之容豈所謂專致其精明者歟此
蓋相沿前明敝典未更後此嚴更鼓角不當用之齋次大學士其
會同該部定議以聞載入會典尋奏謹按鼓爲樂節兼用於軍周
禮夏官凡軍旅夜鼓鼙是也角本軍樂唐乃以備鹵簿有長鳴中

鳴大角三部明制並以鼓角施於鹵簿而於齋壇之次亦遂吹角
嚴鼓猶倣前世警嚴遺意與禮意實屬未協請遵旨停止再查鹵
簿內畫角陳設不用並無考據請敕樂部按其聲音或與鉦鼓等
器同一施用從之○諭稽古虞書秩宗典朕三禮周官宗伯掌邦
禮而首以吉禮事邦國之鬼神而春官典祀職莫重焉乃者 郊
壇 宗廟以太常爲專司而禮部堂官不莅其事非古也治神人
和上下敬服乃職其所有事者何在大學士會同該部並會典館
總裁官詳議以聞尋奏謹按周禮大宗伯凡祀大神而治其大禮
小宗伯相祭祀之小禮此今禮部尙書侍郎之職也肆師立國祀
之禮以佐大宗伯此今太常寺之職也今 兩郊大祀 皇上先
詣 壇位親閱而禮臣未與贊襄前期五日遣王公一人視牲前
期二日遣禮部尙書一人看牲皆由太常寺題請而 宗廟 社

稷及壇廟犧牲遵豆亦太常寺閱看禮部止於祭日委官會御史監視於典禮未協請嗣後皇上詣郊壇省閱禮部尙書侍郎皆陪從侍儀宗廟社稷暨朝日夕月先農等壇歷代帝王先師孔子廟祭前期看牲及祭日看陳遵豆亦派禮部堂官一員率太常卿等將事再壇廟內例用御史四員侍儀而與陪祀王公百官行禮之處用御史監禮無別嗣後用禮部堂官二人都察院堂官二人分立侍儀以隆體制又祭日請送神牌尙用太常寺官恭捧嗣後應派禮部堂官一人上香行禮並請送太廟神位仍用宗室覺羅官恭捧其上香行禮卽於派出朔望上香之王公內每祭以二人將事又查會典凡祭祀禮部於每歲九月中札欽天監選期送部轉札太常寺於前期具題等語見在徑由太常寺移監於正月自行題達嗣後應由禮部選期具

題奉旨後交太常寺按時豫行題請再查禮部滿尚書見在兼管
樂部太常寺鴻臚寺事嗣後滿尚書職銜內卽加兼管樂部太常
寺鴻臚寺字樣著爲成例從之○辛亥調嚴有禧爲山東按察使
王師署河南按察使○癸丑諭稽古明禋肇祀 郊壇各以其色
地壇方色尙黃今 皇祇室乃用綠瓦蓋仍前明舊制未及致
詳朕思 南郊大享殿在勝國時合祀 天 地山川故其上覆
以青陽玉葉次黃次綠具有深意且 南郊用青而 地壇用綠
於義無取其議更之至 兩郊壇宇雖歲加塗墍而經閱久遠應
敕所司省視所當修整者敬謹從事大學士會同該衙門詳考典
章具議以聞尋奏明代南北兩郊分祀而 皇祇室編次綠瓦徧
檢禮書並無考據查天元地黃綠乃青黃閒色今 北郊壇輒遺
瓦及牲帛幃幄色俱用黃乾隆十三年議定遶豆成式 地壇祭

器亦用苗甯神與歆神不當有異應請易蓋琉璃黃瓦庶與黃中之義相符從之○丙辰命四川茂州等一百三十二州縣分別兵差繁簡蠲免額賦有差○辛酉 上詣 黑龍潭祈雨○癸亥尙書舒赫德奏履勘金沙江從前新柱尹繼善等會勘議修自新開灘至黃草坪五百八十餘里實屬有益應留之工其從前奏停經滇督奏開之蜈蚣嶺等十五灘則有損無益見仍須陸運諭舒赫德奏履勘金沙江工程一摺所見甚屬公正該處情形朕早已料及在張允隨因鄂爾泰奏立意興舉鉅工遂爾附和固難辭咎但念伊久任苗疆辦理諸務尙爲妥協若因此事遽加嚴譴未免可惜且此案所有糜費帑項例應著賠今從寬令張允隨在任彌補既可陸續清還亦於事理允協前已詳悉降旨傳諭舒赫德伊具奏時尙未接到可再行傳諭令其接到後遵照辦理○戊辰諭軍

機大臣等據瑚寶奏稱錢價日昂由於棍徒射利私銷欲杜盜銷之源必杜毀錢之利請倣照以一當二之法將錢文鑄重一錢六分並於錢文內鑄重二釐字樣則每錢百文止重一斤毀之僅銀二錢不惟無利而反折錢四十文奸棍無利可圖則銷毀之弊自除等語從前鄂彌達以楚省錢貴請改鑄八分錢亦欲使銷毀之徒無利可趨後以奸徒毀制錢二千卽可私鑄三千以致銷鑄兩弊均難杜絕經部議改正仍遵舊制夫欲杜私銷而轉啓私鑄之弊將銷毀益甚此理易明人所共曉今瑚寶復請改鑄當二錢謂每錢百文重止一斤毀之僅值銀二錢不知毀錢售銅則鑄輕固無從獲利若毀以私鑄則毀錢一千可鑄當二錢七百五十文抵見錢一千五百文其弊與鄂彌達所改八分小錢何異愚民趨利如鶩因盜鑄而盜銷更多是欲杜盜銷之一弊而更滋盜鑄盜銷

之二弊矣以朕觀之錢價時有低昂此亦與年歲相爲贏縮當時和年豐百昌滋殖物阜直賤錢價自平至立法之減輕加重當十當百皆前此所講論一法行而諸弊起但經置議民間卽受錢貴之累不如以不治治之瑚寶所見知其一不知其二甚屬錯謬著傳旨申飭之○癸酉諭江蘇按察使翁藻據署撫雅爾哈善參奏已降旨交部嚴加察議其員缺甚屬緊要王師曾任江蘇卽著調補速行赴任嚴有禧著仍留河南按察使任不必前赴山東○丙子命高晉仍回山東按察使任

六月辛巳諭各部侍郎職貳六卿必須豫選勝任之員以備臨時簡用從前曾降旨令大學士尙書各舉所知密行保奏朕思登明選公何以密爲著滿漢大學士尙書再將能勝侍郎及三品京堂人員侍郎等將勝三品京堂人員均各舉一二人不必過拘資格

務須克知灼見毋濫毋隱保齊吏部帶領引見從前保舉人員內
有未補用者先帶領引見○戊戌諭我朝定鼎以來酬庸賞功列
爵惟五分等惟三以表世閥而第宏勳雍正年間因公爵居五等
之首倣古封號字義錫以嘉名此誠篤念勳舊俾奕世子孫承襲
者顧名思義意至厚也但封爵之制公侯伯一體優崇前代侯則
有冠軍定遠之稱伯則有誠意威甯之號今公爵令名炳著而侯
伯僅分等次似屬缺略朕欲推廣其意凡我朝所封侯伯考厥成
勞追加美號庶伊嗣人咸念乃祖乃父之忠勤紹修令緒國家實
攸賴焉至於子男同位古以地爲號未有別封可仍其舊其侯伯
如何詳稽勳績定制命名之處該部妥酌定議以聞○丙午諭岳
鍾琪參奏阿桂一案經軍機大臣等會同刑部審擬定罪阿桂隨
往軍營辦事年少無知自干罪戾固應按律重懲但伊係司員原

不過以供驅使其獲罪之處與貽誤軍務者有閒情有可原伊父阿克敦因子犯罪深知慚愧辦理事務甚爲黽勉且高年僅有此子拘繫囹圄別無朝夕左右之人朕爲垂憫著加恩將阿桂從寬釋放交與阿克敦嚴加約束毋許稍有滋事